

UDHËZIM
Nr. 584, datë 31.7.2019

**PËR RREGULLAT, PROCEDURAT DHE VEPRIMET KONKRETE TË
AUTORITETEVE TË PUSHTETIT QENDROR OSE VENDOR, SI DHE
DETYRIMET E PERSONELIT MJEKËSOR OSE TË PROFESIONISTËVE TË
FUSHAVE TË TJERA, QË LIDHEN ME PARANDALIMIN OSE TRAJTIMIN E
RASTEVE TË BRAKTISJES SË FËMIJËS NË INSTITUCIONET E KUJDESIT
SHËNDETËSOR**

Në mbështetje të pikës 5, të nenit 100 të Kushtetutës së Republikës së Shqipërisë dhe pikës 9, të nenit 8, të ligjit nr. 18/2017 “Për të drejtat dhe mbrojtjen e fëmijës”,

UDHËZOJ:

KREU I
TË PËRGJITHSHME

1. Qëllimi i këtij udhëzimi është përcaktimi i procedurave dhe veprimeve konkrete të personelit mjekësor dhe profesionistëve të fushave të tjera për parandalimin dhe trajtimin e rasteve të braktisjes së fëmijës në institucionet e kujdesit shëndetësor.

2. Personeli mjekësor dhe profesionistët e fushave të tjera kanë detyrimin për raportimin e rasteve të identifikuara në rrezik braktisjeje dhe rasteve të braktisjes së fëmijës në institucionet e kujdesit shëndetësor.

3. Punonjësi për mbrojtjen e fëmijës (“PMF” në vijim) në bashkëpunim me institucionet e kujdesit shëndetësor kanë detyrimin të identifikojnë dhe trajtojnë rastet në rrezik braktisjeje ose të braktisjes së fëmijës në institucionet e kujdesit shëndetësor.

KREU II
PARANDALIMI I BRAKTISJES SË FËMIJËVE DHE DETYRIMET E
PERSONELIT MJEKËSOR DHE TË PROFESIONISTËVE TË FUSHAVE TË
TJERA NË INSTITUCIONIN E KUJDESIT SHËNDETËSOR

1. Institucionet e kujdesit shëndetësor (personeli mjekësor dhe profesionistët e fushave të tjera) kur gjatë ushtrimit të veprimtarisë së tyre konstatojnë raste në rrezik braktisjeje të fëmijës nga:

- a) nëna që janë në pritje të një fëmije;
- b) nëna, babai ose kujdestari ligjor

duhet të referojnë rastin të PMF-jë përkatëse ku ka vendbanimin familja, nëna, babai ose kujdestari ligjor i fëmijës.

2. Punonjësit e personelit mjekësor dhe profesionistët e fushave të tjera, brenda 24 orëve nga momenti i identifikimit të rasteve në rrezik braktisjeje, plotësojnë dhe dërgojnë pranë PMF-së përkatëse formularin e referimit dhe mbrojtjes së fëmijës, sipas përcaktimeve të bëra në aneksin 2, të vendimit nr. 578, datë 3.10.2018 “Për procedurat e referimit e të menaxhimit të rastit, hartimin dhe përmbajtjen e planit individual të mbrojtjes, financimin e shpenzimeve për zbatimin e tij, si dhe zbatimin e masave të mbrojtjes”.

3. Referimi i rasteve bëhet me qëllim parandalimin e braktisjes së fëmijës dhe bazohet në dyshime të arsyeshme të personelit mjekësor ose profesionistëve duke u nisur nga rrethanat sociale, ekonomike e psikologjike të familjes ose nënës.

4. PMF-ja pas raportimit të rastit nga personeli mjekësor ose profesionistët e fushave të tjera bën një vlerësim të rastit dhe ofron mbështetje ndërgjegjëse për familjet ose nënat të cilat janë në kushtet e tentativës për të braktisur fëmijët.

5. PMF-ja gjatë ushtrimit të veprimtarisë duhet të ketë një fokus të veçantë ndaj familjeve dhe nënave të cilat kanë fëmijë ose janë në pritje të lindjes së një fëmije, lidhur me rrezikun për braktisjeje, duke konsideruar dhe vlerësuar kushtet sociale, ekonomike e psikologjike.

6. PMF-ja referon rastin edhe te njësia e referimit e vlerësimit të nevojave, e cila bën një vlerësim të kushteve sociale ekonomike të familjes.

7. PMF-ja në bashkëpunim me njësinë e referimit e vlerësimit të nevojave ka detyrimin të identifikojë për raste të tilla shërbime mbështetëse për familjen ose nënën.

KREU III TRAJTIMI I RASTEVE TË BRAKTISJES

1. Kur fëmija braktiset në maternitet ose institucione të tjera të kujdesit shëndetësor, personeli social dhe mjekësor i tyre, brenda 24 orëve, njofton me telefon dhe me shkrim PMF pranë pushtetit vendor dhe policinë.

2. PMF-ja pranë pushtetit vendor, në bashkëpunim me punonjës të policisë, përgatit raportin me shkrim mbi faktin e braktisjes së fëmijës, i cili nënshkruhet nga të dyja palët.

3. Pas raportimit të rastit, PMF-ja merr masa për menaxhimin e rastit dhe vendosjen e fëmijës në përkujdesje alternative, sipas ligjit nr. 18/2017 “Për të drejtat dhe mbrojtjen e fëmijës” dhe vendimit nr. 578, datë 3.10.2018 “Për procedurat e referimit të menaxhimit të rastit, hartimin dhe përmbajtjen e planit individual të mbrojtjes, financimin e shpenzimeve për zbatimin e tij, si dhe zbatimin e masave të mbrojtjes”.

4. PMF-ja gjatë procesit të menaxhimit të rastit bën përpjekje për të kontaktuar nënën e fëmijës dhe merr masa për të këshilluar atë për të ushtruar përgjegjësitë prindërore.

5. PMF-ja gjatë ushtrimit të detyrave të saj bashkëpunon me strukturat vendore të policisë së shtetit dhe me strukturat e tjera të Bashkisë.

6. Ngarkohet Agjencia Shtetërore për të Drejtat dhe Mbrojtjen e Fëmijës që të organizojë trajnime për personelin e përfshirë në trajtimin e rasteve të braktisjes, lidhur me mënyrën e trajtimit dhe parandalimit të rasteve të braktisjes së fëmijëve.

7. Ngarkohet Agjencia Shtetërore për të Drejtat dhe Mbrojtjen e Fëmijës që të zhvillojë fushata ndërgjegjëse lidhur me parandalimin e rasteve të braktisjes së fëmijëve.

8. Ngarkohen Ministria e Shëndetësisë dhe Mbrojtjes Sociale, Agjencia Shtetërore për të Drejtat dhe Mbrojtjen e Fëmijëve dhe strukturat për mbrojtjen e fëmijëve në nivel vendor për zbatimin e këtij udhëzimi.

Ky udhëzim hyn në fuqi pas botimit në Fletoren Zyrtare.

MINISTËR I SHËNDETËSISË
DHE MBROJTJES SOCIALE
Ogerta Manastirliu